

Sant' Antoni e l' avara.

(*Dialèt gurizzàn*).

Ai tims che sant Antoni di Pàdoa predicava a Gurizza, viveva in citàt una siora assai rica e altretànt avara. Una dì sant Antoni, avìnt la gola suta dal tant prediciá, l'è lat cà di ché siora avara e i à preati che i gi dedi un sclip di vin par bagná la so gola arsida. La siora, quantuncia avès plens i vassiei di vin in ciàniva, i à diti che no veva nancia una gota. Allora sant Antoni, par ciastiála da la so avarizia, i à cambiat il vin in aga; i à fat sclopá i vassiei e fat inondá la ciàniva. Lis babis di Gurizza disin che esìst anciamò ché ciàniva cun duta la so aga; e che par quant si veti fat par suiála, nuia no i à zovàt. Ma il fat l'è, che precisamentri in chel luc, dulà che jara la ciàniva, l'è presentementri un poz simpri plen di aga, ad onta dal sec che poc o trop al suia i altris poz.

LUIGI PETEANI.

Pal frut.

L'è miei ce che Dio mande
che chel che si domande.

Contentaisi dal onèst
par no piardi chel e il rest.

* * *

Che sei pùare la vite, ma contente.
La puaretât 'e jé une gran ricezze
scuindude in ogni cur c' al si contente....